



Bosnia and Herzegovina
Federation of Bosnia and Herzegovina
CANTON SARAJEVO
Anti-Corruption Office

Broj: 20-04-25814-5/24
Sarajevo, 05.07.2024. godine

Na osnovu člana 19. st. (1) i (2) i člana 23. Zakona o prevenciji i suzbijanju korupcije u Kantonu Sarajevo („Službene novine Kantona Sarajevo“, br. 35/22, 44/22-Ispravka i 52/22-Ispravka) Ured za borbu protiv korupcije Kantona Sarajevo donosi:

ODLUKU

(1) Nakon provedenog postupka utvrđivanja postojanja sukoba interesa za Jusufbegović Admira, Ured za borbu protiv korupcije Kantona Sarajevo utvrdio je postojanje sukoba interesa za imenovanog, jer istovremeno obavlja dvije javne funkcije, i to javnu funkciju gradskog pravobranioca Grada Sarajeva i javnu funkciju člana Drugostepenog organa za žalbe u Općinskom vijeću Općine Centar, što predstavlja povredu odredaba člana 5. stav (1) Zakona o prevenciji i suzbijanju korupcije u Kantonu Sarajevo.

(2) Poziva se Jusufbegović Admir da podnese ostavku ili da na drugi način odstupi sa jedne nespojive javne funkcije navedene u tački (1) ove odluke, i to u roku od 30 dana od dana prijema ove odluke, te da o istom obavijesti Ured za borbu protiv korupcije Kantona Sarajevo.

Образложење

Ured za borbu protiv korupcije Kantona Sarajevo zaprimio je od strane fizičkog lica, 22.04.2024. godine, prijavu sukoba interesa u kojoj se, između ostalog, navodi da Jusufbegović Admir istovremeno obavlja dvije javne funkcije i to javnu funkciju gradskog pravobranioca Grada Sarajeva i javnu funkciju člana drugostepenog organa za žalbe u Općinskom vijeću Općine Centar, što je u suprotnosti sa članom 5. stav (1) Zakona o prevenciji i suzbijanju korupcije u Kantonu Sarajevo, koji propisuje da nosilac javne funkcije može istovremeno obavljati samo jednu javnu funkciju iz člana 2. tačka c) ovog zakona, osim ako posebnim propisom nije drugačije određeno. U cilju utvrđivanja tačnosti navoda iz zaprimljene prijave, a shodno članu 12. stav (1) Zakona o prevenciji i suzbijanju korupcije u Kantonu Sarajevo, Ured za borbu protiv korupcije Kantona Sarajevo je pokrenuo i proveo postupak za utvrđivanje postojanja sukoba interesa u predmetnom slučaju. Predmetni ured je Rješenjem broj: 20-04-25814/24 od 24.04.2024. godine, pokrenuo postupak za utvrđivanje postojanja sukoba interesa za Jusufbegović Admira.

Ured za borbu protiv korupcije Kantona Sarajevo je aktom, Obavijest o pokretanju postupka za utvrđivanje postojanja sukoba interesa i zahtjev za pismeno izjašnjenje broj: 20-04-25814-1/24 od 24.04.2024. godine, a shodno članu 16. stav (1) Zakona o prevenciji i suzbijanju korupcije u Kantonu Sarajevo, obavijestio imenovanog o pokrenutom postupku za utvrđivanje postojanja sukoba interesa za istog, te je zatražio pismeno izjašnjenje na navode iz ove obavijesti. U prilogu akta od 24.04.2024. godine, imenovanom je dostavljeno Rješenje broj: 20-04-25814/24 od istog dana.

Izjašnjenje na navode iz Obavijesti o pokretanju postupka za utvrđivanje postojanja sukoba interesa i Zahtjev za pismeno izjašnjenje od strane Jusufbegović Admira, ovaj ured zaprimio je 17.05.2024. godine. U Izjašnjenju imenovani ističe da su navodi iz akta Ureda za borbu protiv korupcije Kantona Sarajevo, od 24.04.2024. godine, tačni u dijelu u kojem se konstatuje da je imenovani istovremeno pravobranilac Grada Sarajevo i član Drugostepenog organa za žalbe u Općinskom vijeću Centar Sarajevo, ali osporava navode da se radi o sukoba interesa odnosno o eventualnoj nespojivosti javnih funkcija. Nadalje, navodi da su imenovanja na javne funkcije na različitim nivoima vlasti koje nisu u direktnom odnosu nadređenosti i podređenosti odnosno da Grad Sarajevo ni na koji način nije drugostepeni organ u pogledu odluka donesenih od strane nadležnih općina, već su to nadležna ministarstva odnosno Kantonalni sud u slučaju pokretanja upravnog spora. Dodatno navodi da je imenovan na javne funkcije prije stupanja na snagu Zakona o prevenciji i suzbijanju korupcije u Kantonu Sarajevo, a da je retroaktivna primjena zakona apsolutno zabranjena jer narušava pravnu sigurnost i pravnu izvjesnost.

U cilju pravilnog odlučivanja u predmetnom slučaju, Ured za borbu protiv korupcije Kantona Sarajevo je uputio Zahtjev za dostavljanje informacije i dokaza, broj: 20-04-25814-1/24 A.A. od 27.05.2024. godine, Općinskom vijeću Centar, i to u pogledu dostavljanja informacije ko su trenutni članovi Drugostepenog organa za žalbe u Općinskom vijeću Centar, kao i kopije akta o njihovom imenovanju.

Također, ovaj ured je uputio Zahtjev za dostavljanje informacije i dokaza, broj: 20-04-25814-2/24 A.A. od 27.05.2024. godine, Gradskom vijeću Grada Sarajeva, i to u pogledu dostavljanja informacije ko je trenutni Pravobranilac Grada Sarajeva, kao i kopiju akta o njegovom imenovanju.

Ured za borbu protiv korupcije Kantona Sarajevo je 06.06.2024. godine zaprimio Informaciju, broj: 01-GV-04-761-1/24 od 03.06.2024. godine, od Gradskog vijeća Grada Sarajeva, u kojoj se navodi da je Admir Jusufbegović trenutni Pravobranilac Grada Sarajeva. Kao dokaz za navedeno, u prilogu Informacije od 03.06.2024. godine, Gradsko vijeće Grad Sarajevo, dostavilo je kopiju Odluke o imenovanju pravobranioca Pravobranilaštva Grada Sarajeva, Admira Jusufbegovića broj: 01-GV-02-574/22 od 04.04.2022. godine.

Dana 02.07.2024. godine ovaj ured je zaprimio Informaciju Općinskog vijeća Centar, broj: 01-04-65/24 od 02.07.2024. godine u kojoj se, između ostalog, navodi da je Admir Jusufbegović trenutni član Drugostepenog organa za žalbe Općine Centar, **imenovan od strane Općinskog vijeća Centar**, Odlukom o izboru članova Drugostepenog organa za žalbe u Općinskom vijeću Centar, broj: 01-03-24/21 od 28.01.2021. godine. U prilogu predmetne informacije dostavili su navedenu odluku.

Ured napominje da Zakona o prevenciji i suzbijanju korupcije u Kantonu Sarajevo u članu 2. stav (1) tačka c) alineja (4) propisuje da se nosiocima javne funkcije smatraju druga lica koja su izabrana ili imenovana ili je za njihov izbor ili imenovanje data saglasnost od strane Skupštine, Gradskog vijeća Grada Sarajevo, općinskog vijeća, Vlade Gradonačelnika ili načelnika.

Dalje, Zakon o pravobranilaštvu Kantona Sarajevo ("Sl. novine Kantona Sarajevo", br. 33/2008 - prečišćeni tekst, 7/2012, 44/2016 i 45/2021) u članu 45. stav (1) propisuje da **Gradskog**, odnosno općinskog pravobranioca i njegovog zamjenika **imenuje, smjenjuje i razrješava Gradsko, odnosno općinsko vijeće**, na prijedlog gradonačelnika, odnosno općinskog načelnika.

Shodno citiranim odredbama Zakona o prevenciji i suzbijanju korupcije u Kantonu Sarajevo Gradski pravobranilac imenovan od strane Gradskog vijeća Grada Sarajeva **smatra se nosiocem javne funkcije**. Također, član radnog tijela Općinskog vijeća, u konkretnom slučaju Drugostepenog organa za žalbe u Općinskom vijeću Centar Sarajevo, imenovan od strane Općinskog vijeća **smatra se nosiocem javne funkcije**.

Na osnovu dokumentacije koju ovaj ured posjeduje, utvrđeno je postojanje sukoba interesa za Jusufbegović Admira, jer imenovani istovremeno obavlja dvije javne funkcije, i to javnu funkciju gradskog pravobranioca Grada Sarajeva i javnu funkciju člana Drugostepenog organa za žalbe u Općinskom vijeću Općine Centar što predstavlja povredu odredaba člana 5. stav (1) Zakona o prevenciji i suzbijanju korupcije u Kantonu Sarajevo.

Nosilac javnih funkcija, Jusufbegović Admir, dužan je u roku od 30 dana od dana prijema ove odluke, podnijeti ostavku ili na drugi način odstupiti sa jedne od javnih funkcija koje istovremeno obavlja i o tome pismeno obavijestiti Ured za borbu protiv korupcije Kantona Sarajevo.

Shodno navedenom, Ured za borbu protiv korupcije Kantona Sarajevo je u skladu sa članom 19. st. (1) i (2) Zakona o prevenciji i suzbijanju korupcije u Kantonu Sarajevo odlučio kao u dispozitivu ove odluke.

Ova odluka stupa na snagu danom donošenja i obavezujuća je za nosioca javnih funkcija.

Pouka o pravnom lijeku: Ova odluka je konačna i protiv iste nosilac javnih funkcija može pokrenuti upravni spor.



ŠEF UREDA

Erduan Kafedžić

Dostaviti:

1. Imenovanom,
2. Za objavu na internet stranici Ureda za borbu protiv korupcije Kantona Sarajevo,
3. a/a.